

四庫全書

集部

欽定四庫全書

樂府詩集卷四

宋 郭茂倩輯

郊廟歌辭

周祀圜丘歌

庾信

隋書樂志曰周祀圜丘樂降神奏昭夏
皇帝將入門奏皇夏俎入奠玉帛並奏昭夏
皇帝升壇奏皇夏初獻及初獻配帝並作

雲門之舞獻畢奏登歌飲福酒奏皇夏撤
奠奏雍樂帝就望燎位還便坐並奏皇夏

昭夏

重陽裡祀大報天景午封壇肅且圜孤竹之管雲和弦
神光來下風肅然王城七里通天臺紫微斜照影徘徊
連珠合璧重光來天策輦轉鈎陳開

皇夏

旌迴外壝蹕靜郊門千乘按轡萬騎雲屯藉茅无咎掃

地惟尊揖讓展禮衡璜節步星漢就列風雲相顧取法
於天降其永祚

昭夏

日至大禮豐犧上辰牲牢脩收鹵栗毛純俎豆斯立陶
匏以陳大報反命居陽兆日六變鼓鐘三和琴瑟俎奇
豆偶惟誠惟質

昭夏

園玉已奠蒼幣斯陳瑞形成象璧氣含春禮從天數智

總園神為祈為祀至敬咸遵

皇夏

七星是仰八陛有憑就陽之位如日之升思虔肅肅施
敬繩繩祝史陳信玄象斯格惟類之典惟靈之澤幽顯
對揚人神咫尺

雲門舞

獻以誠鬱以清山疊舉沈齊傾惟尚饗洽皇情降景福
通神明

雲門舞

長丘遠歷大電遙源
弓藏高隴鼎沒寒門
人生于祖物本於天
尊神配德迄用康年

登歌

歲之祥國之陽蒼靈敬翠雲長象為飾龍為章
乘長日埽蟄戶烈雲漢迎風雨六呂歌雲門舞
省祿濯奠牲牲鬱金酒鳳凰尊迴天睠顧中原

皇夏

國命在禮君命在天陳誠惟肅飲福惟虔洽斯百禮福
以千年鈎陳掩映天駟徘徊彫禾飾筆翠羽承蠡受斯
茂祉從天而來

雍樂

禮將畢樂將闋迴日轡動天關翠鳳搖和鑾響五雲飛
三步上風為馭雷為車無轍迹有煙霞暢皇情休靈命
雨畱甘雲餘慶

皇夏

六典聯事九司咸則率由舊章於焉允塞掌禮移次燔
柴在焉煙升玉帛氣歛牲牷休氣馨香膋芳昭晰翼翼
虔心明明上徹

皇夏

玉帛禮畢人神事分嚴承乃瞻瞻仰迴雲輦路千門王
城九軌式道移候司方迴指得一惟清於萬斯寧受茲
景命于天告成

周祀方澤歌

度信

隋書樂志曰周祀方澤樂降神及奠玉帛
並奏昭夏初獻奏登歌舞詞同圜丘望坎
位奏皇夏

昭夏

報功陰澤展禮玄郊平琮鎮瑞方鼎升庖調歌絲竹縮
酒江茅聲舒鍾鼓器質陶匏列燿秀華凝芳都荔川澤
茂祉丘陵容衛雲飾山罍蘭浮汎齊日至之禮歆茲大
祭

昭夏

曰若厚載欽明方澤敢以敬恭陳之玉帛德包含養功
藏靈迹斯箱既千子孫則百

登歌

質明孝敬求陰順陽壇有四陞琮為八方牲牲蕩滌蕭
合馨香和鑾戾止振鷺來翔威儀簡簡鐘鼓嚶嚶聲和
孤竹韻入空桑封中雲氣坎上神光下元之主功深蓋
藏

皇夏

司筵撤席掌禮移次迴顧封壇恭臨坎位瘞玉埋俎藏
芳歛氣是曰就幽成斯地意

周祀五帝歌

隋書樂志曰周祀五帝奠玉帛及初獻並
奏皇夏皇帝初獻五帝及初獻配帝並奏
雲門舞

皇夏

嘉玉惟芳嘉幣惟量成形依禮稟色隨方神班其次歲
禮惟常威儀抑抑率由舊章

皇夏

惟令之月惟嘉之辰司壇宿設掌史誠陳敢用明禮言
功上神鈎陳旦闕閭闔朝分疏垂象冕樂奏山雲將迴
霆策蹕轉天文五運周環四時代序鱗次玉帛循迴樽
俎神其降之介福斯許

青帝雲門舞

甲在日鳥中星禮東后奠蒼靈樹春旗命青史候雁還
東風起歌木德舞震宮泗濱石龍門洞孟之月陽之天
億斯慶兆斯年

配帝舞

帝出於震蒼德於神其明在日其位居春勞以定國功
以施人言從配祀近取諸身

赤帝雲門舞

招搖指午對南宮日月相會實沈中離光布政動溫風

純陽之月樂炎精赤雀丹書飛送迎朱絃絳鼓罄虔誠
萬物含養各長生

配帝舞

以炎為政以火為官位司南陸享配離壇三和寶俎百
味浮蘭神其茂豫天步艱難

黃帝雲門舞

三光儀表正四氣風雲同戊己行初歷黃鍾始變宮平
琮禮內鎮陰管奏司中齋壇芝甍甍清野桂馮馮夕牢

金匱要略卷四
卷四
芬六鼎安歌韻八風神光乃超忽佳氣恒葱蔥

配帝舞

四時成一德五氣或同論猶吹鳳凰管尚對梧桐園
器園居土厚位總配神尊始知今奏樂還用我雲門

白帝雲門舞

肅靈兌景承配秋壇雲高火落露白蟬寒帝律登年金
精行令瑞獸霜輝祥禽雪映司藏肅殺萬保一作咸宜寶

厥田上上收功在斯

配帝舞

金行秋令白帝朱宣司正五雉歌庸九川執文之德對
越彼天介以祉福君子萬年

黑帝雲門舞

北辰為政玄壇北陸之祀員官宿設玄圭浴蘭坎德陰
風御寒次律將廻窮紀微陽欲動細泉管猶調於陰竹
聲未入於春絃待歸餘於送歷方履慶於斯年

配帝舞

地始坼虹始藏服玄玉居玄堂沐蕙氣浴蘭湯匏器潔
水泉香陟配彼福無疆君欣欣此樂康

隋園丘歌

隋書樂志曰仁壽元年詔牛弘柳顧言許
善心虞世基蔡徵等創製雅樂歌辭其祠
園丘降神奏昭夏皇帝升壇奏皇夏次奏
登歌初獻奏誠夏既獻奏文舞飲福酒奏
需夏次奏武舞送神奏昭夏皇帝就燎位

還大次並奏皇夏辭同升壇

昭夏

肅祭典協良辰具嘉薦俟皇臻禮方成樂已變感靈心
迴天睠闕華闕下乾宮垂精氣御祥風望燿火通田燭
膺介圭受瑄玉神之臨慶陰陰烟衢洞宸路深善既福
德斯輔流鴻祚徧區寓

皇夏

於穆我君昭明有融道濟區域功格玄穹百神警衛萬

金匱要略卷四
國承風仁深德厚信洽義豐明發思政勤憂在躬鴻基
惟永福祚長隆

登歌

德深禮大道高饗穆就陽斯恭陟配惟肅血膺升氣冕
裘標服誠感青玄信陳史祝祇承靈貺載膺多福

誠夏

肇禋崇祀大報尊靈因高盡敬掃地推誠六宗隨兆五
緯陪營雲和發韻孤竹揚清我粢既潔我酌惟明元神

是鑒百祿來成

文舞

皇矣上帝受命自天
膚圖作極文教遐宣
四方監觀萬品陶甄
有苗斯格無得稱焉
天地之經和樂具舉
休徵咸萃要荒式序
正位履端秋霜春雨

需夏

禮以恭事薦以饗時
載清玄酒備潔蘋蕡
迴旋分爵思媚軒墀
惠均撤俎祥降受釐
十倫以具百福斯滋
克昌

厥德永祚鴻基

武舞

御歷膺期乘乾表則成功戡亂順時經國兵暢五材武
宏七德憬彼遐裔化行充塞三道備舉二儀交泰情發
自中義均莫大祀敬恭肅鐘鼓繁會萬國斯歡兆人斯
賴享茲介福康哉元首惠我無疆天長地久

昭夏

享序洽祀禮施神之駕嚴將馳奔精驅長離耀牲烟達

潔誠照騰日馭鼓電鞭辭下土升上玄瞻寥廓杳無際
澹羣心畱餘惠

隋五郊歌

隋書樂志曰五郊歌辭青帝奏角音赤帝
奏徵音黃帝奏宮音白帝奏商音黑帝奏
羽音迎送神登歌與圜丘同

角音

震宮初動木德惟仁龍精戒旦鳥歷司春陽光煦物溫

風先導巖處載驚膏田已冒犧牲豐潔金石和聲懷柔
備禮明德惟馨

徵音

長羸開序炎上為德執禮司萌持衡御國重離得位
種在時含櫻薦實木槿垂蕤慶賞既行高明可處順時
立祭事昭福舉

宮音

爰稼作土順位稱坤孕金成德履艮為尊黃本內色宮

實聲始萬物資生四時成紀靈壇汎埽盛樂高張威儀
孔備福履無疆

商音

西成肇節盛德在秋三農稍已九穀行收金氣肅殺商
威颺戾嚴風鼓莖繁霜殞蒂厲兵詰暴敕法慎刑明神
降嘏國步惟寧

羽音

玄英啟候冥陵初起虹藏於天雉化於水嚴關重閉星

迴日窮黃鍾動律廣莫生風玄樽示本天庠惟質恩覃
外區福流京室

隋感帝歌

隋書樂志曰祀感帝奏誠夏迎送神登歌

與圜丘同

誠夏

禘祖垂典郊天有章以春之孟於國之陽鹵栗惟誠陶
匏斯尚人神接禮明幽交暢火靈降祚火歷載隆烝哉

帝道赫矣皇風

隋雩祭歌

隋書樂志曰雩祭奏誠夏迎送神登歌與

園丘同

誠夏

朱明啓候時載陽肅若舊典延五方嘉薦以陳盛樂奏
氣序和平資靈祐公田既雨私亦濡人殷俗富政化敷

隋蜡祭歌

隋書樂志曰蜡祭奏誠夏迎送神登歌與

圜丘同

誠夏

四方有祀八蜡酬功收藏既畢榛葛送終使之必報祭之斯索三時告勞一日為澤神祇必來鱗羽咸致惟義之盡惟仁之至年成物阜罷役息人皇恩已洽靈慶無垠

隋朝日夕月歌

隋書樂志曰朝日夕月並奏誠夏迎送神
登歌與圜丘同

朝日誠夏

扶木上朝暾崑山沈曙景寒來遊暑促暑至馳輝永時
和合璧耀俗泰重輪明執圭盡昭事服冕罄虔誠

夕月誠夏

澄輝燭地域流耀鏡天儀歷草隨弦長珠胎迺望虧成
形表蟾兔竊藥資王母西郊禮既成幽壇福惟厚

隋方丘歌

隋書樂志曰祭方丘迎神奏昭夏奠玉帛
奏登歌獻皇地祇奏誠夏送神奏昭夏餘

並同圜丘

昭夏

柔功暢陰德昭陳瘞典盛玄郊篚幕清管鬯馥皇情虔
具寮肅笙頌合鼓鼗會出桂旗屯孔蓋敬如在肅有承
神胥樂慶福膺

登歌

道惟生育器乃包藏報功稱範殷薦有常六瑚已饋五
齊流香貴誠尚質敬洽義章神祚惟永帝業增昌

誠夏

厚載垂德崑丘主神陰壇吉禮北至良辰鑒水呈潔牲
栗表純樽壺夕視幣玉朝陳羣望咸秩精靈畢臻祚流
於國祉被於人

昭夏

奠既徹獻已周疎靈駕逝遠遊洞四極帀九縣慶方流
祉恒遍埋玉氣掩牲芬晰神理顯國文

隋神州歌

隋書樂志曰祭神州奏誠夏迎送神登歌

與方丘同

誠夏

四海之內一和之壤地曰神州物賴生長咸池既降泰
圻斯饗牲牷尚黑珪玉實兩九寓載寧神功克廣

隋社稷歌

隋書樂志曰祭社稷奏誠夏迎送神登歌

與方丘同

春祈社誠夏

厚地開靈方壇崇祀達以風露樹之松梓句萌既申芟
柞伊始恭祈穡盛載膺休祉

春祈稷誠夏

粒食興教播厥有先尊神致潔報本惟虔瞻榆東耒望

杏開田方憑戩福佇詠豐年

秋報社誠夏

北墉中禮單出表誠豐穰入薦華樂在庭原隰既平泉
流又清如雲已望高廩斯盈

秋報稷誠夏

人天務急農亦勤止或蓂或薦惟蠶惟芑涼風戒時歲
云秋矣物成則報功施必祀

隋先農歌

隋書樂志曰享先農奏誠夏迎送神與方

丘同

誠夏

農祥晨晰土膏初起春原俶載青壇致祀歛蹕長阡迴
旌外壝房俎飾薦山罍沈滓親事朱紘躬持黛耜恭神
務穡受釐降祉

隋先聖先師歌

誠夏

經國立訓學重教先三墳肇冊五典畱篇開鑒理著陶
鑄功宣東膠西序春誦夏弦芳塵載仰祀典無騫

唐祀圜丘樂章

唐書樂志曰貞觀二年祖孝孫修定雅樂
取禮記云大樂與天地同和故製十二和
之樂祭天神奏豫和之樂祭地祇奏順和
祭宗廟奏永和登歌奠玉帛奏肅和皇帝
行及臨軒奏太和王公出入送文舞出迎

武舞入奏舒和皇帝食舉及飲酒奏休和
皇帝受朝奏正和皇太子軒懸出入奏承
和正至皇帝禮會登歌奏昭和郊廟俎入
奏雍和酌獻飲福酒奏壽和六年冬至祀
昊天於圜丘樂章褚亮虞世南魏徵等作
大歷十四年改豫和為元和以避諱也按
唐初作十二和以法天數其後增造非一
頗無法度皆隨時制名云

豫和

上靈賸命膺會昌盛德殷薦叶辰良景福降兮聖德遠
玄化穆兮天歷長

太和

穆穆我后道應千齡登三處大得一居貞禮唯崇德樂
以和聲百神仰止天下文明

肅和

闔陽播氣甄曜垂明有赫圉宰深仁曲成日麗蒼壁烟

開紫營聿遵虔享式降鴻禎

雍和

欽惟大帝載仰皇穹始命田燭爰啓郊宮雲門駭聽雷
鼓鳴空神其介祀景祚斯融

壽和

八音斯奏三獻畢陳寶祚惟永暉光日新

舒和

疊壁凝影皇壇路編珠流彩帝郊前已奏黃鍾歌大呂

還符寶歷祚昌年

凱安

新唐書禮樂志曰貞觀初舞隋文舞曰治
康武舞曰凱安郊廟朝會同用之舞者各
六十四人文舞左篇右翟著委貌冠黑素
絳領廣褱白紵革帶烏皮履武舞左干右
戚服平冕餘同文舞朝會則武弁平巾幘
廣褱金甲豹文紵烏皮鞬執干戚餘同郊

廟凡初獻作文舞亞獻終獻作武舞太廟
降神以文舞及高宗崩改治康舞曰化康
以避諱也舊書樂志曰凱安舞貞觀中造
凡有六變一變象龍興參野二變象尅靖
關中三變象東夷賓服四變象江淮寧謐
五變象獫狁讐服六變復位以崇象兵還
振旅亦如周之大武六成樂止按貞觀禮
享郊廟日文舞奏豫和順和永和等樂麟

德二年十月文舞改用功成慶善樂武舞
改用神功破陣樂并改器服後以慶善樂
不可降神破陣樂不入雅樂復以治康凱
安如故

昔在炎運終中華亂無象鄴郊赤烏見邙山黑雲上大
賁下周車禁暴開殷網幽明同叶贊鼎祚齊天壤

豫和

歌奏畢兮禮獻終六龍馭兮神將昇明德感兮非忝稷


降福簡兮祚休徵

唐郊天樂章

唐書樂志曰太樂舊有郊天送神辭一章
不詳所起

豫和

蘋蘩禮著黍稷誠徵音盈鳳管彩駐龍旂
洪歆式就介福攸歸送樂有闋靈馭遄飛



樂府詩集卷四

欽定四庫全書

集部

樂府詩集卷

八
五至

詳校官庶吉士_臣柳邁祖

助教_臣常循覆勘

總校官知縣_臣繆珙

校對官編修_臣秦瀛

謄錄監生_臣孫承基

欽定四庫全書

樂府詩集卷五

宋 郭茂倩 輯

郊廟歌辭

唐享昊天樂

武后

第一

太陰凝至化真耀
蘊軒儀德邁娥臺
啟仁高如幄披捫
天遂啓極夢日乃昇曦

第二

瞻紫極望玄穹翹至懇罄深衷聽雖遠誠必通垂厚澤
降雲宮

第三

乾儀混成冲邃天道下濟高明闔陽晨披紫闕太一曉
降黃庭園壇敢申昭報方璧冀展虔情丹襟式敷衷懇
玄鑒庶察微誠

第四

巍巍獻業廣赫赫聖基隆菲德承先顧禎符萃渺躬銘
開武巖側圖薦洛川中微誠詎幽感景命忽昭融有懷
慙紫極無以謝玄穹

第五

朝壇霧捲曙嶺煙沉爰設筐幣式表誠心筵輝麗璧樂
暢和音仰惟靈鑒俯察翹襟

第六

昭昭上帝穆穆下臨禮崇備物樂奏鏘金蘭羞委薦桂

醕盈斟敢希明德聿罄莊心

第七

樽浮九醕禮備三周陳誠菲奠契福神猷

第八

奠璧郊壇昭大禮鏘金拊石表虔誠始奏承雲娛帝賞
復歌調露暢韶英

第九

荷恩承顧託執契恭臨撫廟略靜邊荒天兵曜神武有

截資先化無為遵舊矩禎符降昊穹大業光寰宇

第十

肅肅祀典邕邕禮秩三獻已周九成斯畢爰撤其俎載
遷其實或升或降唯誠唯質

第十一

禮終肆類樂闋九成仰惟明德敢薦非馨顧慙菲奠久
駐雲輶瞻荷靈澤悚戀兼盈

第十二

式乾路闢天扉迴日馭動雲衣登金闕入紫微望仙駕
仰恩徽

唐祀昊天樂章

唐書樂志曰景龍三年中宗親祀昊天上帝降神用豫和皇帝行用太和登歌用肅和迎俎用雍和酌獻用福和送文舞出迎武舞入用舒和武舞作用凱安

豫和

天之歷數歸睿唐顧惟非德欽昊蒼撰吉日兮表殷薦
冀神鑒兮降闔陽

太和

恭臨寶位肅奉瑤圖恒思解網每軫泣辜德慙巢燧化
劣唐虞期我良弼式贊嘉謨

告謝

得一流玄澤通三御紫宸遠叶千齡運遐銷九域塵絕
瑞駢闐集殊祥絡繹臻登年慶棲畝稔歲賀盈囷

肅和

悠哉廣覆方矣曲成九玄著象七曜甄明珪璧是奠醞
酎斯盈作樂崇德爰暢咸英

雍和

郊壇展敬嚴配因心孤竹簫管空桑瑟琴肅穆大禮鏗
鏘八音恭惟上帝希降靈歆

福和

九成爰奏三獻式陳欽成景福恭託明禋

中宮助祭升壇

坤元光至德柔訓闢皇風
采芣芳聲遠螽斯美化隆
範超千載嘉猷備六宮
肅恭陪盛典欽若薦禋宗

亞獻

三靈降饗三后配神虔
敷藻奠敬展郊禋

舒和

已陳藻盛敷嚴祀更奏笙
鏞協雅聲璇圖寶歷欣寧謚
晏俗淳風樂太平

凱安

堂堂聖祖興赫赫昌基泰戎車盟津偃玉帛塗山會舜
日啟祥暉堯雲卷征旆風猷被有截聲教覃無外

唐祀圜丘樂章

唐書樂志曰開元十一年玄宗祀昊天於
圜丘降神用豫和六變詞同皇帝行用太
和登歌奠玉帛用肅和迎俎用雍和皇帝
酌獻天神酌獻配座飲福酒並用壽和送

文舞出迎武舞入用舒和武舞用凱安禮
畢送神用豫和皇帝還大次用太和

豫和

至矣丕構烝哉太平投犧膺錄復禹繼明草木仁化鳧
鷖頌聲祀宗陳德無媿斯誠

太和

郊壇齋帝禮樂祠天丹青宸宇宮徵山川神祇畢降行
止重旋融融穆穆納祉洪延

肅和

止奏潛聆登儀宿轉太玉躬奉參鍾首奠簋簠聿昇犧
牲遞薦昭事顯若存存以覩

雍和

爛雲晉洽律風無外千品其凝九賓斯會禋樽晉燭純
犧滌汰玄覆攸廣鴻休汪濊

壽和

六變爰闋八階載虔祐我皇祚於萬斯年

壽和

於赫聖祖龍飛晉陽底定萬國奄有四方功格上下道
冠農黃郊天配享德合無疆

壽和

崇崇泰時肅肅嚴禋藻盛既絜金石畢陳上帝來享介
福爰臻受釐合福寶祚惟新

舒和

祝史正辭人神慶叶福以德昭享以誠接六變云備百

禮斯浹祀事孔明祚流萬葉

凱安

馨香惟后德明命光天保肅和崇聖靈陳信表皇道玉
鉞初蹈厲金匏既靜好

豫和

大號成命思文配天神光彤嚮龍駕言旋渺渺閭闔昭
昭上玄俾昌而大於萬斯年

太和

六成既闋三薦云終神心具醉聖敬愈崇受釐皇邸廻
蹕惟宮穰穰之福永永無窮

唐封泰山樂章

張說

唐書樂志曰開元十三年玄宗封泰山祀
天樂降神用豫和六變迎送皇帝用太和
登歌奠玉帛用肅和迎俎用雍和酌獻飲
福並用壽和送文舞出迎武舞入用舒和
終獻亞獻用凱安送神用豫和

豫和六首 降神

挹泰壇柴

一作款

泰清受天命報天成竦皇心薦樂聲志

上達歌下迎

億上帝臨下庭騎日月陪列星嘉祝信大禧馨澹神心
醉皇靈

相百辟貢八荒九歌叙萬舞翔肅振振鏗皇皇帝欣欣
福穰穰

高在上道光明物資始德難名承眷命牧倉生寰宇謚

太階平

天道無親至誠與隣山川遍禮宮徵惟新玉帛非盛聰
明會真正斯一德通乎百神

饗帝饗親維孝維聖緝熙懿德敷揚成命華夷志同笙
鏞禮盛明靈降止感此誠敬

太和

孝敬中族和容外彰騰華照寓如昇太陽貞璧就奠玄
靈垂光禮樂具舉濟濟洋洋

肅和

奠祖配天承天享帝百靈咸秩四海來祭植我蒼璧布
我玄製華日徘徊神煙容裔

雍和

俎豆有馥粢盛絜豐亦有和美既戒既平鐘鼓管磬肅
唱和鳴皇皇后祖來我思成

壽和

烝烝我后享獻惟寅躬酌鬱鬯跪奠明神孝莫孝子配

上帝親敬莫敬乎教天下臣

壽和

皇祖嚴配配享皇天
皇皇降嘏天子萬年

舒和

六鍾翕協六變成八
佾倘佯八風生樂九
歆兮人神感美七德
兮天地清

凱安

烈祖順三靈文宗威
四海黃鉞誅羣盜朱
旗掃多罪戢

兵天下安約法人心改大哉千羽意長見風雲在

豫和

禮樂終禋燎上懷靈惠結皇想歸風疾迴風爽百神來
衆神往

唐祈穀樂章

褚亮

唐書樂志曰貞觀中正月上辛祈穀於南
郊降神用豫和皇帝行用太和登歌奠玉
帛用肅和迎俎用雍和酌獻飲福用壽和

送文舞出迎武舞入用舒和武舞用凱安
送神用豫和其豫和太和壽和凱安五章
詞同冬至圜丘按貞觀禮祀感帝同用此
詞明慶已後同用冬至圜丘詞

肅和

履艮斯繩居中體正龍運垂祉昭符啓聖式事嚴禋聿
懷嘉慶惟帝永錫時皇休命

雍和

殷薦黍春太壇臨曙八簋盈和六瑚登御嘉稷匪歆德
馨斯飫祝嘏無易靈心有豫

舒和

玉帛犧牲申敬享金絲鉦羽盛音容庶俾億齡禔景福
長欣萬寓洽時邕

唐明堂樂章

唐書樂志曰季秋享上帝于明堂降神用
豫和皇帝行用太和登歌奠玉帛用肅和

迎俎用雍和酌獻飲福用壽和送文舞出
迎武舞入用舒和武舞用凱安送神用豫
和其豫和太和壽和凱安五章詞同冬至
園丘貞觀中褚亮等作

肅和

象天御宇乘時布政嚴配申虔宗禋展敬罇罍盈列樹
羽交映玉幣通誠祚隆皇聖

雍和

金匱要略卷五
八牖晨披五精朝奠霧凝璇籩風清金縣神滌備全明
梁豐行載結葬俎陳誠以薦

舒和

御宸合宮承寶歷席圖重館奉明靈偃武修文九圍泰
沉烽靜柝八荒寧

唐明堂樂章

武后

外辦將出

總章陳昔典衢室禮惟神宏規則天地神用叶陶鈞負

宸三春旦充庭萬宇賓
顧已誠虛薄空慙馭兆人

皇帝行

仰膺歷數俯順謳歌
遠安邇肅俗阜時和
化光玉鏡訟息金科
方興典禮永戢干戈

皇嗣出入升降

至人光俗大孝通神
謙以表性恭惟立身
漢規載啓茂典方陳
譽隆三善祥開萬春

迎送王公

千官肅事萬國朝宗載延百辟爰集三宮君臣德合魚
水斯同睿圖方永周歷長隆

登歌

禮崇宗祀志表嚴禋笙鏞合奏文物惟新敬遵茂典敢
擇良辰絜誠斯著奠謁方申

配饗

笙鏞間玉宇文物昭清暉時影臨芳奠休光下太微孝
思期有感明絜庶無違

宮音

履艮包羣望居中冠百靈萬方資廣運庶品荷財成神
功諒匪測盛德實難名藻藁申誠敬恭祀表惟馨

角音

出震位開平秩扇條風乘甲乙龍德盛烏星出薦珪籩
陳誠實

徵音

赫赫離精御炎陸滔滔熾景開隆暑冀延神鑒俯蘭鐔

式表虔襟陳桂俎

商音

律中夷則序應收成功宣建武義表惟明爰申禮奠庶
展翹誠九秋是式百穀斯盈

羽音

葭律肇啓隆冬

一作蘊

藻攸陳饗祭黃鍾既陳玉燭紅

粒方殷稔歲

唐雩祀樂章

唐書樂志曰孟夏雩祀上帝于南郊降神
用豫和皇帝行用太和登歌奠玉帛用肅
和迎俎用雍和酌獻飲福用壽和送文舞
出迎武舞入用舒和武舞用凱安送神用
豫和其豫和太和壽和凱安五章詞同冬
至園丘貞觀中褚亮等作

肅和

朱鳥開辰蒼龍啓暎大帝昭饗羣生展敬禮備懷柔功

宣舞詠旬液應序年祥叶慶

雍和

紺筵分彩瑤圖吐絢風

一作鳳

管晨凝雲歌曉嘒肅事頒

藻

一作蘭羞

虔申桂奠百穀斯登萬箱攸薦

舒和

鳳曲登歌調令序龍雩集舞泛祥風綵旒雲迴昭睿德
朱千電發表神功

唐雩祀樂章

唐書樂志曰太樂舊有雩祀降神送神辭
二章不詳所起或云開元中造

豫和

烏緯遷序龍星見辰純陽在律明德崇禋五方降帝萬
寓安人恭以致享肅以迎神

豫和

祀遵經設享緣誠舉獻畢于樽撤臨于俎舞止于戚樂
停祝啟歌以送神神還其所

樂府詩集卷五

欽定四庫全書

樂府詩集卷六

宋 郭茂倩 輯

郊廟歌辭

唐五郊樂章

唐書樂志曰祀五方上帝五郊樂祀黃帝
降神奏宮音皇帝行用太和登歌奠玉帛
用肅和迎俎用雍和酌獻飲福用壽和送

文舞出迎武舞入用舒和武舞用凱安送
神用豫和其太和壽和凱安豫和四章辭
同圜丘祀青帝降神奏角音祀赤帝降神
奏徵音祀白帝降神奏商音祀黑帝降神
奏羽音餘同黃帝並貞觀中魏徵等作

黃帝宮音

黃中正位含章居貞既長六律兼和五聲畢陳萬舞乃
薦斯牲神其下降永祚休平

肅和

渺渺方輿蒼蒼圜蓋至哉樞紐宅中圖大氣調四序風
和萬籟祚我明德時雍道泰

雍和

金懸夕肆玉俎朝陳饗薦黃道芬流紫宸廼誠廼敬載
享載禋崇薦斯在惟皇是賓

舒和

御徵乘宮出郊甸安歌率舞遽將迎自有雲門符帝賞

猶持雷鼓答天成

青帝角音

鶴雲旦起鳥星昏集律候新風陽開初蟄至德可饗行
潦斯挹錫以無疆蒸人乃粒

肅和

玄鳥司春蒼龍登歲節物變柳光風轉蕙瑤席降神朱
絃饗帝誠備祝嘏禮殫珪幣

雍和

大樂稀音至誠簡禮文物棣棣聲明濟濟六變有成三
登無體迺眷豐潔恩覃愷悌

舒和

笙歌簫舞屬年韶鷺鼓鳧鍾展時豫調露初迎綺春節
承雲遽踐蒼霄馭

赤帝徵音

青陽告謝朱明戒序咸長是祈敬陳椒醕博碩斯薦笙
鏞備舉庶盡肅恭非馨稷黍

肅和

離位克明火中宵見峰雲暮起景風晨扇木槿初榮含
桃可薦芬馥百品鏗鏘三變

雍和

昭昭丹陸奕奕炎方禮陳牲幣樂備箎簧瓊羞溢俎玉
醑浮觴恭惟正直歆此馨香

舒和

千里溫風飄絳羽十枝炎景騰朱干陳觴薦俎歌三獻

拊石撚金會七盤

白帝商音

白藏應節天高氣清歲功既阜庶類收成萬方靜謐九
土和平馨香是薦受祚聰明

肅和

金行在節素靈居正氣肅霜嚴林凋草勁豺祭隼擊潦
收川鏡九穀已登萬箱流詠

雍和

律應西成氣躔南呂珪幣咸列笙竽備舉苾苾蘭羞芬
芬桂醑式資宴貺用調霜序

舒和

璿儀氣爽驚縵籥玉呂灰飛含素商鳴鞀奏管芳羞薦
會舞安歌葆旒揚

黑帝羽音

嚴冬季月星迴風厲享祀報功方祚來歲

肅和

律周

一作四

玉琯星迴

一作周

金度次極陽烏紀窮陰兔火

林霰雪陽泉凝沍八蜡已登三農息務

雍和

陽月斯紀應鍾在候載絜牲粢爰登俎豆既高既遠無
聲無臭靜言格思惟神保佑

舒和

執籥持羽初終曲朱干玉鉞始分行七德九功咸已暢
明靈降福具穰穰

唐五郊樂章

唐書樂志曰太樂舊有五郊迎送神辭十

章不詳所起

黃郊迎神

朱明季序黃郊王辰厚以載物甘以養人毓金為體稟
火成身宮音式奏奏以迎神

送神

春末冬暮徂夏杪秋土王四月時季一周黍稷已享籩

豆宜收送神有樂神其賜休

青郊迎神

緹幕移候青郊啓蟄淑景遲遲和風習習璧玉宵備旌
旄曙立張樂以迎帝神其入

送神

文物流彩聲明動色人竭其恭靈昭其飭歆薦無已垂
禎不極送禮有章惟神還軼

赤郊迎神

青陽節謝朱明候改靡草凋華

一作花

含桃流彩虞列鍾

磬筵陳脯醢樂以迎神神其如在

送神

炎精式降蒼生攸仰羞列豆遵酒陳犧象昭祀有應冥

期

一作期
令儀

不爽送樂張音惟靈之往

白郊迎神

序移玉律節應金商天嚴殺氣吹警秋方楨燎既積稷
奠並芳樂以迎奏庶降神光

送神

祀遵五禮時屬三秋人懷肅敬靈降禎休奠歆白酒薦
享珍羞載張送樂神其上遊

黑郊迎神

玄英戒序黑郊臨候掌禮陳彝司筵執豆寒雰歛色沍
泉凝漏樂以迎神八音斯奏

送神

北郊時列南陸輝處奠本虔誠獻彌恭慮上延祉福下

承歡豫廣樂送神神其整馭

唐朝日樂章

唐書樂志曰貞觀中朝日樂降神用豫和
皇帝行用太和登歌奠玉帛用肅和迎俎
用雍和酌獻飲福用壽和送文舞出迎武
舞入用舒和武舞用凱安送神用豫和其
豫和太和壽和凱安五章詞同冬至圜丘

肅和

惟聖格天惟明饗日帝郊肆類王宮戒吉珪璆春舒鍾
歌曉溢禮云克備斯文有秩

雍和

晨儀式薦明祀惟光神物爰止靈暉載揚玄端肅事紫
幄興祥福履攸假於昭允王

舒和

崇牙一作虞樹羽延調露旋宮扣律掩承雲誕敷懿德昭

神武載集豐功表睿文

金匱要略卷六
唐朝日樂章

唐書樂志曰太樂舊有朝日迎送神辭二章不詳所起

迎神

太陽朝序王宮有儀蟠桃彩駕細柳光馳軒祥表合漢
歷彰奇禮和樂備神其降斯

送神

五齊兼酌百羞具陳樂終廣奏禮畢崇禋明鑒萬寓照

臨兆人永流洪慶式動曦輪

唐夕月樂章

唐書樂志曰貞觀中夕月樂降神用豫和
皇帝行用太和登歌奠玉帛用肅和迎俎
用雍和酌獻飲福用壽和送文舞出迎武
舞入用舒和武舞用凱安送神用豫和其
豫和太和壽和凱安五章詞同冬至圓丘

肅和

金匱要略卷六
測妙為神通微曰聖坎祀貽則郊禋展敬璧薦登光金
歌動暎以載嘉德以流曾慶

雍和

肅晨爭舉天宗禮闕夜典涼秋陰明湛夕有醑斯旨有
牲斯碩穆穆其暉穰穰是積

舒和

合吹八風金奏動分容萬舞玉鞘驚詞昭茂典光前列
夕曜乘功表盛明

唐蜡百神樂章

唐書樂志曰貞觀中蜡百神樂降神用豫
和皇帝行用太和登歌奠玉帛用肅和迎
俎用雍和酌獻飲福用壽和送文舞出迎
武舞入用舒和武舞用凱安送神用豫和
其豫和太和壽和凱安五章詞同冬至圜

丘

肅和

序迫歲陰日躔星紀爰稽茂典聿崇清祀綺幣霞舒瑞

珪虹起百禮

一作靈

垂裕萬靈薦

一作方受

祉

雍和

緹籥勁序玄英晚候姬蜡開儀幽歌入奏蕙馥彫俎蘭
芬玉酎大享明祇永綏多祐

舒和

經緯兩儀文化洽削平方域武功成瑤絃自樂乾坤泰
玉鉞長歡區縣寧

唐蜡百神樂章

唐書樂志曰太樂舊有蜡百神迎送神辭
二章不詳所起

迎神

八蜡開祭萬物合祀上極天維下窮坤紀鼎俎流馥一作
芳尊藝薦美有靈有祗咸希來止

送神

十旬歡洽一日祠一作祀終澄彝拂俎報德酬功慮虔容

肅禮縟儀豐神其降祉整馭隨風

唐祀九宮貴神樂章

唐天寶中祀九宮貴神樂降神用豫和六
變皇帝行用太和登歌用壽和迎俎用雍
和酌獻用壽和飲福酒用福和退文舞迎
武舞用舒和亞獻終獻用凱安登歌撤豆
用肅和送神用豫和

豫和

於昭上穹臨下有光羽翼五佐周流八荒誰其饗之時
文對敷虞經夏典茲禮未遑

黑帝旋馭青躔導日金錄上玄玉堂初吉鈎陳夕次鑒
和先蹕謁謁羣靈昭昭咸秩

帝臨中壇受釐元神皇靈萃止羽旄肅陳攝提運衡招
搖移輪光光宇宙電耀雷震

夜如何其明星煌煌天清容衛露結壇場樹羽幢幢佩
玉鏘鏘凝精駐目瞻望神光

九位既肅萬靈畢會天門啓局日御飛蓋煥兮琴離儼
兮暗靄如山之福惟聖時對

崇崇泰壇靈具臨兮鏗鏘大樂振動心兮神之降矣卿
雲郁兮神之至止清風肅兮

太和

帝在靈壇大明登光天回雲粹穆穆皇皇金奏九夏圭
陳八簫曠哉動植如熙春陽

肅和

歌工既奏神位既秩天符衆星運行太一聲和十管氣
應中律肅肅明廷介茲元吉

雍和

俎豆有踐黃流在罇九宮之祀三代莫存樂變六宮壇
開八門聖皇昭對祐我黎元

肅和

時文哲后肅事嚴禋馨我明德饗于一作我貴神大庖載

盈旨酒斯醇精意所屬期於利人

福和

祀既云畢明靈告旋禮洽和應神歆福延

一作福至神虔

動植

咸若陰陽不愆錫茲祝嘏天子萬年

舒和

羽籥既闋干戚陳八音克諧六變新愉貴神兮般以樂

保皇祚兮萬斯春

凱安

盛德陳萬舞稜威暢九垓風雲交律候日月律昭回行

慶休祥發乘春和氣來百神肅臨享蕩蕩天門開

肅和

精意嚴恭明祠

一作祀

豐絜獻酬既備俎豆斯撤日麗天

儀風和樂節事光祀典福覃有截

豫和

享申百禮慶洽百靈上排閭闔洞入杳冥奠玉高壇蟠
柴廣庭神之降福萬國咸寧

唐祀風師樂章

包佶

迎神

太皞御氣句芒肇功蒼龍青旗爰候祥風律以和應神
以感通鼎俎脩饗時惟禮崇

奠幣登歌

旨酒告絜青蘋應候禮陳瑤幣樂獻金奏彈弦自昔解
凍惟舊仰瞻彤璽羣祥來湊

迎俎酌獻

德盛昭臨迎拜興方爰候發生式薦馨香酌醴具舉工

歌再揚神畝入律恩隆百祥

亞獻終獻

腎鄉備玉帛陳風動物樂感神三獻終百神臻草木榮
天下春

送神

微穆敷華能應節飄揚發彩宜行慶送迎靈駕神心饗
跪拜靈壇禮容盛氣和草木發萌芽德暢禽魚遂翔泳
永望翠蓋逐流雲自茲率土調春令

唐祀雨師樂章

包佶

送神

陟降左右誠達幽圉作解之功樂惟有年雲輶戾止灑
霧飄烟惟馨展禮爰列豆籩

奠幣登歌

歲正朱明禮布元

一作玄

制惟樂能感與神合契陰霧離

披靈馭搖裔膏澤之慶期於稔歲

迎俎酌獻

陽開幽蟄躬奉鬱鬯禮備節應震來靈降動植求聲飛
沈允望時康氣茂惟神之貺

亞獻終獻

奠既備獻將終神行令瑞飛空迎乾德祈歲功無烟燎
儼從風

送神

整駕昇車望寥廓垂陰薦祉蕩昏氛饗時靈貺倏如在
樂罷餘聲遙可聞飲福陳誠禮容備撤俎終獻曙光分

跪拜臨壇結空想年年應節候油雲

唐祭方丘樂章

唐書樂志曰貞觀中夏至祭皇地祇於方
邱迎神用順和皇帝行用太和登歌奠玉
帛用肅和迎俎用雍和酌獻飲福用壽和
送文舞出迎武舞入用舒和武舞用凱安
其太和壽和凱安三章詞同冬至圜丘並
褚亮等作

順和

萬物資以化文泰屬昇平易從業惟簡得一道斯寧具
儀光玉帛送舞變咸英黍稷良非貴明德信惟馨

肅和

至矣坤德皇哉地祇開元統紐合大承規九宮肅列六
典相儀永言配命長保無虧

雍和

柔而能方直而能敬厚載以德大亨以正有滌斯牲一
作

牲
有馨斯盛介茲景福祚我休慶

舒和

玉幣牲牷分薦享羽旄干鉞遞成容一德惟寧兩儀泰
三材保合四時邕

順和
送神

陰祇協贊厚載方貞牲幣具舉簫管備成其豐惟肅其
德惟明神之聽矣式鑒虔誠

唐大享拜洛樂章

武后

唐書樂志曰則天皇后永昌元年大享拜
洛樂禮設用昭和次致和次威和乘輿初
行用九和次拜洛受圖用顯和登歌用昭
和迎俎用敬和酌獻用欽和送文舞出迎
武舞入用齊和武舞用德和撤俎用禋和
辭神用通和送神用歸和按樂志又有歸
和一章亦送神辭也

昭和

九玄眷命三聖基隆奉承先旨明臺畢功宗祀展敬冀
表深衷永昌帝業式播淳風

致和

神功不測兮運陰陽包藏萬宇兮孕八荒天符既出兮
帝業昌願臨明祀兮降禎祥

咸和

坎澤祠容備舉坤壇祭典爰申靈睴遙行祕躅嘉貺荐
委殊珍肅禮恭禋載展翹襟懇志逾殷方期交際懸應

下一句逸

九和

祇荷坤德欽若乾靈慙惕罔寘興居匪寧恭崇禮則肅
奉儀形惟憑展敬敢薦非馨

顯和

拜洛

非躬承睿顧薄德忝坤儀乾乾遵後命翼翼奉先規撫
俗勤雖切還淳化尚虧未能弘至道何以契明祇

顯和

受圖

顧德有慙虛菲明祇屢降禎符汜水初呈祕象溫洛荐
表昌圖玄澤流恩載洽丹襟荷渥增愉

昭和

舒陰致養合大資生德以恒固功由永貞升歌薦序垂
幣翹誠虹開玉照鳳引金聲

敬和

蘭俎既昇蘋羞可薦金石載設咸英已變林澤斯總山
川是遍敢用敷誠實惟忘倦

齊和

沈潛演貺分三極廣大凝禎總萬方
既薦羽旌文化啓還呈干鉞武威揚

德和

夕惕司龍契晨兢當鳳扆
崇儒習舊規偃伯循先旨
絕壤飛冠蓋遐區麗山水
幸承三聖餘忻屬千年始

禋和

百禮崇容千官肅事靈降舞兆神凝
有粹奠享咸周威

儀畢備奏夏登列歌雍撤肆

通和

皇皇靈睟穆穆神心暫動凝質還歸積陰功玄樞紐理
寂高深銜恩佩德聳志翹襟

歸和

言旋雲洞今躡烟途永寧中宇今安下都包涵動植今
順榮枯長貽寶貺今贊璇圖

歸和

調雲闕兮神座興
駢雲駕兮儼將昇
騰絳霄兮垂景祐
翹丹慤兮荷休徵

唐祭方丘樂章

唐書樂志曰睿宗太極元年祭皇地祇於
方丘迎神用順和八變加金奏皇帝行用
太和登歌奠玉帛用肅和迎俎及酌獻用
雍和送文舞出迎武舞入用舒和武舞用
凱安送神用順和太和凱安詞同貞觀冬

至園丘肅和雍和詞同貞觀太廟舒和詞

同皇帝朝羣臣

順和

坤厚載物德柔垂祉九域咸雍四溟為紀敬因良節虔修陰祀廣樂式張靈其降止

金奏

坤元至德品物資生神凝博厚道協高明列鎮五嶽環流四瀛于何不載萬寶斯成

順和

樂備金石禮光尊俎大享爰終洪休是舉雨零感節雲
飛應序纓紱載辭皇靈具舉

樂府詩集卷六